

適園叢書

張宗祥



通國書香

吳昌碩



太平治蹟統類卷十九

宋彭百川撰

宣仁保祐哲宗

元豐八年三月哲宗卽位

夏四月丁丑資政殿大學士銀青光祿大夫呂公著兼侍讀

公著時知揚州召用之遵先帝意也

先是神宗諭輔臣曰皇
子明年出閣當以公著

爲師傅至是
公著侍經筵

癸未司馬光上疏言人君之德三曰仁曰明

曰武致治之道三曰任官曰信賞曰必罰其言略云臣歷觀
古今之行事竭盡平生思慮質諸聖賢之格言治亂安危存
亡之道舉在於是不可私易是以區區首爲累朝言之不知
臣者以爲臣進迂闊陳熟之語知臣者以臣爲識天下之本

原也

六月丙子起知陳州韓維赴闕遂留經筵 丁丑呂公著入
見上奏竊思人君卽位之始宜講求修德爲治之要以正其
始然後日就月將學有緝熙於光明新而又新以至於大治
用是竭愚誠論聖道概舉十事仰贊聰明一曰畏天二曰愛
民三曰修身四曰講學五曰任賢六曰納諫七曰薄斂八曰
省刑九曰去奢十曰無逸伏望陛下留神幸察如言有可采
乞置御座朝夕顧省庶聖德少助萬一 癸未龍圖閣待制
趙彥若兼侍讀祕書監傅堯俞兼侍講先是御史劉摯言陛
下紹膺天命傳序統業夫以異稟之質夙成之善又上有太
皇太后之至仁厚德保護開祐所以成就者備矣然方春秋

鼎盛之時在所資養左右前後宜正人與居語默見聞宜正士是接則勸講進讀輔導之官可不審擇也哉伏見兼侍講給事中陸佃蔡卞皆新進少年越次暴起論德則未試語望則素輕使在此官眾謂非宜請罷兼職以允公議仍望於內外兩制以上官內別選經術有行義忠信孝弟淳茂老成之人以充其任於是佃卞皆罷因彥若堯俞有是命 詔今月十三日開講筵進讀寶訓講讀官日赴資善堂以雙日講讀仍留一員宿直初講及更旬宰相執政並赴 乙亥初御邇英閣詔三省樞密院侍讀修注官講讀錫宴於資善堂資銀帛有差

元祐元年二月甲戌上御邇英閣侍讀韓維進讀至天禧有

二宮人犯罪法當死眞宗皇帝惻然憐之曰此等安知法殺之則不忍捨之則無以勵眾仍使人持去笞而遣之又幸汾陰日見一羊自擲於道左右曰今日尙食殺其羔眞宗慘然不樂自是不殺羊羔因奏言此雖小善然推是心以及天下則仁不可勝用也眞宗自澶淵卻狄之後十有九年不言兵而天下富其源蓋出於此外人皆言陛下仁孝發於天性每行見蟲蟻輒避而過之且敕左右勿踐履此亦仁術也臣願陛下推此心以及百姓則天下幸甚

三月甲寅龍圖閣待制兼侍讀趙彥若爲兵部侍郎兼侍讀宰相司馬光言今討論經史上自伏羲下至周威烈王略舉大要合爲二十卷名曰稽古錄伏望看詳送祕書省正字范

祖禹等令繕寫上進候讀祖宗寶訓了日乞取此書進讀從之 庚午呂公著言伏覩今月十五日以講筵講畢論語賜執政及講官御講筵是日上出皇帝御書唐賢律詩分賜臣等各一篇臣次日於延和殿簾前謝蒙太后宣諭皇帝好學在宮中別無行爲惟留心典籍天下幸甚伏思陛下睿哲之性出於天縱而內稟慈訓日新典學誠以堯舜三代爲法則四海不勞而治今俟論語終帙進講尙書二書皆聖人格言爲君要道願陛下念茲在茲以廣信德臣職在輔導無能裨補輒於尙書論語及孝經中節取要語共一百段進呈惟取明白切治道者庶便省覽或游意筆墨之間以備揮染亦日就月將之一助也他日三省奏事畢太后宣諭公著所進尙

書論語要義百篇今日皇帝已依所奏每日書寫看覽甚有
益於學問與寫不同也公著與同列者言此聖人經訓有補
於治日宜親閱 壬申詔講讀官遇不開講日輪具漢唐故
事有益政體者二條進入仍旬一錄申三省先是侍讀蘇頌
言國朝典章大抵依唐史史官所記善惡咸備乞詔史官學
士采新唐書中臣主所行日進數則以備聖覽故有是
詔

三年二月己丑司諫豐稷爲國子司業楊王顥荆王顥常令成都
走馬承受官者造錦地衣稷白御史胡宗愈言之愈狐疑未
決稷卽獨劾御史趙屺與稷同進對退謂稷曰聞君言使屺
汗流給事趙君錫曰諫官如是天下必太平不數日稷徙他

官

五月侍講范祖禹言陛下卽位四年幸賴太后至仁盛德母臨天下垂拱無爲治內晏然當今之務學問爲急陛下今日學與不學係天下他日之治亂又云凡人進學莫不貴於年少之時陛下聖質日長龍德日進數年之後雖欲勤於學問恐不得如今日專也臣竊惜此日月願以學問爲急天下幸甚

四年十二月左諫議劉安世上章言禁中求乳母事云或者之論乃謂陛下稍疏先王之經典親近後庭之女寵此聲流播實損聖德先是范祖禹上疏皇帝曰臣侍經筵於今累年陛下天縱先知聖德純茂對臣下日日如一未嘗少有差失

此天眷皇家保生民社稷宗廟無疆之休也太祖皇帝肇造
區夏櫛風沐雨削平僭亂爲子孫萬世之基傳太宗至眞宗
遂致太平仁宗年十三卽大位章獻明肅太后安定邦家調
護聖躬四十三年之間德澤深結於民天下至今思慕不忘
英宗自藩邸入繼大統四海之內同心愛戴先帝勵精求治
嘗宵衣旰食躬勤萬事十有九年不幸早棄天下陛下始十
年登寶位當時人心凜凜憂危萬端陛下幸賴太后保祐
扶濟艱難斥逐凶邪登進忠良詔令所至百姓懽呼年來中
外晏然北狄西戎無不順從皆太皇太后之德也臣不知陛
下將何以報之臣竊惟陛下所以報之惟在進德愛身而已
進德則爲萬世太平之主愛身則無疾疢不貽太皇太后之

憂令羣臣萬民之心情正望朝廷如天聖已來惟望法則仁宗而已祖宗天下百三十年如寶器之無缺陛下行純德備如美玉之無瑕臣竊謂陛下保之惜之愛之重之陛下可不愛惜聖體哉陛下好德則賢人動心欲助陛下之德如好色則小人皆動心欲奉陛下之欲而圖一身富貴賢人進則治小人進則亂人君所好一身損益實係天下治亂不可不慎陛下於此將何擇焉伏望察臣之心精專一意勉強學問日新德業事親則思孝居處則思敬動思禮聽思誠服用思儉養民思仁使人思恕心則思道視則思正當食則思天下之飢當衣則思天下之寒陛下思此而強學不已以道德爲麗仁義爲美豈聲色可移哉惟抑情欲愛聖體爲先則動植之

類無不蒙福又上太皇太后曰陛下憂勤必憂天下之本愛
養四方之民必先愛一人之身一人之身天下之本也天下
安危係於一人之身安則天下俱安天下治亂出於人君一
心心正而天下正欲安天下必先安身正天下必先正心此
二者當今急務久遠之計也嘗觀司馬光言章獻明肅太后
保護仁宗食必與俱最爲有法伏望陛下與皇太后太妃詳
論此事有損聖德無益聖體宜戒飭保傅令一以章獻爲法
深思遠慮察臣狂瞽之言疏皆留中他日呂大防奏事將
退太皇太后留大防謂曰劉安世有文字言禁中求乳母事
意則甚善但渠不知此非官家所要乃先帝一二小公主尙
須飲乳也官家常在老身榻前閣內寢處老身又常究治具

無可說與安世令休入文字太防對曰諫官例不與宰相見
太后曰然則將如何止安世文字勿令再入大防曰范祖禹
現修實錄臣閒日過實錄院必見祖禹劉安世與之同省臣
當以聖旨令祖禹告安世太皇太后因言祖禹亦有疏論列
後宮進御事并令大防諭旨及祖禹得大防所諭聖旨卽過
安世此係德之污隆安世以諫名官安敢緘默大防侍經筵
上所親信又豈得不言祖禹曰固嘗言之安世曰宰相所傳
聖旨盍具奏知萬一有爲貽悔其可追乎安世遂奏云若陛
下實未嘗爲臣之所言猶不廢職陛下萬一有之則臣進說
已是後時雖不敢逃曠官之誅顧亦可補奏事惟冀陛下愛
身進德清心寡欲臣不勝惓惓愛君之至范祖禹奏緣臣二

十五日以前未見大防不知已有聖旨更入後來文字今日大防諭乃知臣等所聞外議盡是虛傳陛下怒臣狂愚不賜誅責然臣言進德愛身宜常爲戒太皇太后保護皇帝安身正心遠慮亦願勿忘外議雖虛亦足爲先事之戒也 其後章惇爲相上謂惇曰元祐太皇太后道宮嬪在朕左右者二十人皆年長一日覺十人者非素使令頃之十人至十人還復易去十人其去而還者皆顏色慘沮若方涕泣者朕甚駭不敢問後乃知因劉安世等上疏太皇太后詰之惇與蔡京謀誣元祐大臣嘗有廢立議指安世祖禹言爲根二人遂得罪幾死

五年春范百祿兼侍講詔講讀官今後每遇經筵退留講官

各一員於邇英奏對正月燾嘗奏疏曰大學之道在明明德
謂人君有清明之德必由學以發之然後光被四表格於上
下以此知天子之尊而能成聖德必由明德乎陛下受天明
命早有萬國日就月將學以成性此正其時願擇吉日詔開
經筵優接進讀勸講之臣使從容反復治亂之事究先王之
蘊辨歷代之蹟無惜聖問詢攷聖心曉然日新一日可底大
成願加意勿忽又奏太皇太后曰今皇帝聖年已十五齒亦
長矣孔子曰吾十有五而志於學皇帝天稟英異以聖人志
學之時稽焉不可不學也願陛下當三春布德之先王正授
政之始面勉皇帝開經筵召見儒臣談經讀史從容賜對熟
復古今宮中選茂俊之人誘掖誦說擇謹愿之人輔視興寢

服勤道義爲聰明睿智之助疏遠紛華爲康寧壽考之資習
久乃成自然至於誠意喜書正心樂道終副海內聖神之望
不貽宸衷逸豫之憂養成靜治爲太平之賢主焉

二月壬寅邇英閣講畢無逸篇詔詳錄所講義以進今後具
講義次日別進是月范祖禹對邇英閣劄子言伏見仁宗皇
帝慶歷初七月出御製觀文鑒圖記以示輔臣皇祐元年十
一月御崇政召近臣三館臺諫官及宗室觀三朝訓鑒圖二
圖皆嘗賜臣僚禁中必有本陛下永日觀書之暇閒覽此圖
可以見前代帝王之迹知祖宗勲業之難有所勸戒易於記
省亦好學不倦之一端也 給事中兼侍講范祖禹上帝學
八篇且言三皇之時至質略矣伏羲始開人文神農以下皆

有師賢人之德莫大於學在易乾之六爻龍德變化皆聖人
九二曰見龍在田孔子曰龍德在正中也由學以聚之問以
辨之故天下文明九三曰君子終日乾乾孔子曰進德修業
欲及時也至九五飛龍在天與天地合德日月合明四時合
序鬼神合其吉凶先天而天不違後天而奉天時聖人之德
莫盛於此由學以致之九二九三皆曰利見大人蓋非學不
能爲大人故堯舜垂衣裳而天下治聖學之效也揚雄曰學
之爲王者事其已久矣堯舜禹湯文武汲汲仲尼皇皇其已
久矣學始於伏羲至於成王易詩所常稱者少自古治日常
少亂日常多推原其本由人君不學也恭惟本朝累聖相承
百三十有二年四方無虞中外底寧德澤深厚遠過前世由